

# JEREMÍAS

## Jawen unanmati janchaki

Isafasin jatu yusinpanan ninkabuma 114 año kaya jau yuixunkubainun Jehován Jeremías katua año 626 Cristo judiamatian Jerusalén anuxun Jeremíasin jatu yusinkin taewanikiaki. Jehován jancha danantan yushibubu dami kenwankin chakabu betsa betsapa akubainaibu Jehován jatu kupixanai Jeremíasin jatu yuibia ninkakatsi ikama jaskai jiwei peabuma Jeremías ichakawakubainaibu jatuwen nui kaxakunkainaiwen taexun Jeremías kenakin: “Dios yuixunika nui kaxanikaki”, apaunibukiaki. Jatu kupikatsi ikin ninkabuma ixanaibu unankin jau jatu nemakubainun Jehován Jeremías yunua bikabiaken jawen daya Jeremíasin jeneama ikunkainikiaki.

---

### Jeremías Diosun jancha yuixunika taenikiaki, na janchadan

**1** <sup>1</sup>Hilquíasin juni bake Jeremíasin yuini inun akubaini matu yuinun ninkakanwen. Benjamínen enabun mai pakea anu mae betsa Anatot anu Jeremías jiweniki. Jawen epa inun jawen xenipabu junibu jawenabu Diosbe janchaxunikabu ipaunibuki. <sup>2</sup>Judán enabun mai pakea anu Jerusalén anu Amónen juni bake Josías xanen ibukunkaini ma 13 año kainaitian Jehová Jeremíasbe janchai taeniki. <sup>3</sup>Ja dikabi Jerusalén anu Josíasin juni bake Joaquim xanen ibukunkainaitian inun Josíasin juni bake betsa maxku Sedequíasdi xanen ibuyama 11 año kainaitian Jehová jabe janchakunkainiki. Janua jabias 11 añotian 5 uxe kaya Jerusalén Babilonia anuabun achitan janu jiweabu Babilonia anu jatu iyuaibun Jehová Jeremíasbe janchakunkainiki.

### Jhován Jeremías katutan kushipawanikiaki, na janchadan

<sup>4</sup>Jhován ea jancha wakin yuikin:

<sup>5</sup>“Min ibubun mia bikin nanediama  
bebunkidi en mia katuniki.

Minabu xukuabu tibi jiwebaunabu anu  
en jancha ea yuixunika min ikunkainxanun

min kaindiana ean mia medibi wakin en mia paxkaniki”, ea wa

6 ean kemakin yuikin:

“¡Min ea peidawawa! Jehováan, en bedunan  
en jancha tapinkin en unandiamaki”, akin

7 en jaska wabia Jehován ea yuikin:

“En bedunanki, ikin yuiyamawe.

Janu en mia yunuai anu min kakunkainxanaii.

Jaska en mia janchamai janchakin min jatu yuikubainxanaii.

8 Jaska en mia yunuaiwen taedan, tsuki dateyamakunkainxanwen.

Eanan, mia mekei mibe kakin

en mia medabewaxanaii.

Ea Jehován chanima en jancha en mia inaiin”, iwanan,

9 Jehován mexunkidan en kexa mekin ea yuikin:

10 “Min kexa anu en jancha mistukin en mia inaiin.

Natian mia tsuan binutidumawakin en mia kushipawaii.

Xanen ibu kushipabu inun dasibi nawabu jiwebaunabu

min jatu betsea keska waxanai inun betsabu min jatu bedanxanaii.

Betsabu jatu nuitapawakin min jatu yamawaxanaii.

Betsabu min jatu denekin akawaxanaii.

Ja dikabi betsabu medabewakin min jatu ana benixanaii,

miban ana banakin jatu akawakinan”, iwanan,

11 januxun ea uinmakin Jehován ea yukakin:

“Jeremíasiin, ¿jawa min uiain?” ea wa

ean kemakin yuikin:

“Almendro ji mebi en uiain”, en wa

12 Jehován ea ana yuikin:

“Jaska chanima min pe yuiiai.

Jaska en yunua jau chibankin menekubainunbun

eadi uxama en uinkubainxanaii”, ea watan,

13 ana ja kachu Jehován ea yukakin:

“¿Min jawa uiain?” ea wa

ean kemakin:

“Kenti pichanmea kukatsa iki ma nortekidi kexkan

jukukatsis ikai en uiain”, en wa

14 Jehován ana ea yuikin:

“Ja mai pakea nortekidi jiweabu

chakabu atimapa bekin jatu na mai pakea achixankanikiki.

15 Ea Jehován chanima en jaska waxanai en mia yuiiai.

Nortekidia xanen ibu betsa betsapa dasibibu

jawen detenamenikabuya

en jatu kenaxanaii.

Mae tibi anu xanen ibubu bea Jerusalén jikiti xui tibi bebun inun

Judán mai pakea mae bekex tibi mishkiwen kenebaunibu

kexebaunxun

jatu yunukin jatun xanen ibu tibi tsauti anu tsaubaunxankanikiki.

16 Nawabun jatun yushibu dami watan kenwanmisbu

enabundi ja dami kenwankin

ja bebunxun xeni ininipa kuakubainkin

ea danankin jenenibuwen taexun

ja chakabubu jau jatu kupinunbun

xanen ibu chakabubu jatu anu en yunuxanaii.

17 Miadan, ibubis kushipawe, jawa dateamadan.

Jatu anu kaxun

en jancha dasibi mia yuikin en mia yunuxu

jatu yuikubaintanwen.

Jaska en mia yunuai min betsa waya

jatu bebunxun en mia saki saki imatiduwen taea

jatuwen dateyamaxanwen.

18 Judán enabun mai pakea anu jiweabu

jatun xanen ibujaidabu inun,

jatun xanen ibu yununika bexmasbu inun,

minabu ebe janchaxunikabu inun,

yudabu mae anu jiwebaunabu bebunxun

min jatu nemakubainxanun

mae mishkiwen kenebaunkin keyatapa wanibu keska mia wakin inun,

mane hierro chibu kushipa keska mia wakin

broncewen mae kenebaunibu keska mia watan

ikis ean mia nichinkin en mia yunuaii.

19 Mia mekei en mibe kakunkainxanaiwen taexun

jabun mia ninkama miki sinatabiakin

mia jawa binumama ixankanikiki.

Ea Jehován chanima en jancha en mia inaiin.”

**Israelin enabun Jehová danankin chiban  
pewama inibukiaki, na janchadan**

**2** <sup>1</sup> Betsatian Jehován ana ea jancha wakin yuikin:

<sup>2</sup> “Jerusalén anu kaxun jadi jiweabu ea jatu jancha waxuntanwen,  
jau ninka pe wanunbun

jui kushipawen jatu yuitanwen:

‘Eska Jehován matu yuikiki.

Matun xenipabu anibudiana inun yuxabudiabuman  
en jancha chibankin ea dananma inibu en jatu shinaiin.

En jatu ainwankin akawa ea bechipainibuki.

Janu tsua jiwexun mibankin uduisbumanu

en jatu iwea kapukekubidankin

matun xenipabun ea chibankubidanibuki.

<sup>3</sup> Israelin enabu ena wakin jatu paxkatan en jatu medibi waniki,  
bimi pepa ja dukun tsekaxun adumisbu keska wakinan.

Tsuanda enabu ichakawakin jatu bika tenemaibu

ean jatu kupixundiakin atimapa chakabu en jatu anu yunupauniki.

Ea en Jehován en chanima janchawen en mia mestenwaiin’ ”, ea  
waniki.

<sup>4-5</sup> Betsatian ana jatu yuikin:

Jacobun enabu Israelin bakebu xukuabu tibibuun,

Jehován eska matu jancha waikiki, ninkakanwen.

“Matun xenipabunan, ¿en jawa jatu chakabuwa

ea anua bechitan ea jenebainimabumen?

Ja dios kayabima jamen dami chibainmabudan,

ibubis maetan jatumebi jawa ana kushipa jayabumaki.

<sup>6</sup> Matun xenipabu Egipto anua en jatu taxnimabidankin

mai chakabu taxka unpax jayama anu inun,

jamapai mese tibi jaya janu tsua jiweama inun,

janu tsua kapukekainsma anu jatu iwekubidankin

nenu en jatu jiwemabiani

en ana jatu medabewatiduma dabanen ikin ea ana benakin

matun xenipabun ea shinanma inibuki.

<sup>7</sup> Janua yunu inun bimi pepa jau pikubainxanunbun

na mai pepa anu min xenipabu iwexun

en jatu ibu wamaniki.

En jatu ibu wamani anu matudi kaintan janua yumetan

en mai chakabuwakin atimapa wakin

man ea dananmakin ea jatsanmaii.

<sup>8</sup> Matunabu ebe matu janchaxunikabun ea benabumaki.

Moisin jancha una jayabia jawen ea unanbiakin

yusinanbun ea shinanbumaki.

Matun xanen ibubun en jancha bechipaiama ea danankubainibuki.

En jancha yuixunikabun yushibu Baal janchaxunkubainibuki.

Yushibu dami tibi jawa medabewatidubumajaida jamen  
kenwankubainibuki”, ikin

**Israelin enabu Jehován jatu chitenikiaki, na janchadan**

- 9 “Eskawen taexun ea Jehován eska en matu mestenwaiin:  
Matu inun matun bababu en matuki ja iki taeaii.
- 10-11 Nawabun ea ikunwanbuman yushibu kenwankin jenetan  
yushibu betsa kenwain maeakeakekanimenkain,  
benabaunkin jau uin pewatanunbun  
mae ewapa Quedar anu tsuada yunukanwen.  
Jabiaskadiakanimenkainan, yushibu tibi kenwain maeidan.  
Jatu uin badi kaikidi natukan betsa betsapa anu butankanwen.  
Ja yushibubu dios kayabima maewakin betsa katuisbumaki.  
Jakia man enabunan, ea bechipaiama man ma ea jeneabuki,  
en matun mekenan kushipa en duapa matun xenipabun ea  
uinbianibunan.  
Jaska wakin damipan jawa jatu medabewatidumabiaken chibankin  
enabun ea jenenibuki.
- 12 Nai anuabuun, jaska en yuixu ninkai mesejaidakubainkanwen,  
datei saki saki ikidan.  
Ea en Jehován en chanima janchawen en mestenwaiin.
- 13 Israelin enabu en jatu ibuwabiani  
ichapajaidaki chakabui kextunibuki.  
En jatun jiwemati chacha unpax keskabiaken  
ea jenebainibuki.  
Jaskakin jatumebi mishki pukintan unpax aduti keska wabia  
ibubis pesetan jani ana unpax matati jayama keskai  
yushibubu kushipa jayama dami watan chibankubainibuki.

**Israelin enabun Dios jenekubainaibu jatu  
kupikubainikiaki, na janchadan**

- 14 Israelin enabu tsuan dayadu esclavomaki.  
Jatun ibu esclavoma ibianiwen taea  
Israelin enabu esclavo kainyama inibuki.  
¿Jaskakin nawabun jatu achitan jatuna wamisbumen?
- 15 ¿Jaskakin inu betsa león pubein tekeden tekeden ikidanai keskakin  
minabu jatu mesewakubainmisbumen?  
Matun mai pakea chakabuwakin keyubaunkin  
matun maewan tibi kuakubaunmisbudan,  
janu tsua ana jayabumaki.
- 16 Egipto anu maewan dabe Menfis inun Tafnes anua bexun

- matun buxka matu pusa pusa abaunkin keyuyamabuki.
- 17 Na eska nawabun matu wakinan,  
 ea en matun mekenika Jehován en baiwen en matu iyubia ea chibanma  
 man ea jeneabuwen taexun matu ichakawamisbuki,  
 en ana jawa matu jatu nemaxunamadan.
- 18 ¿Jaskai Jene Nilo anu unpax anun ikai keskai  
 Egipto anu man kamismen,  
 jau matu medabei benunbun jatu benaidan?  
 ¿Jaskai Jene Éufrates unpax anun ikai keskai  
 Asiria anu man jamen kamismen,  
 jau matu medabewai benunbun jatu benaidan?
- 19 Man jaskamiswen taea matun chakabuwen ibubis man kupiti  
 bikubainaii.  
 Duawakin man ea ninkaismawen taea ibubis man benuxanaii.  
 En ea Jehová en matun mekenikabia  
 man ekidi janchai peama ea jenekubainmisbudan,  
 mesejaida inun chakabujaida man tenekubainxanaii.  
 Jaska uinkin mekin shinankubainxankanwen.  
 En Jehová kushipa dasibi binuawen taea  
 en jancha en mestenwaiin”, iwanan,

**Israelin enabun Dios danankin sinatamanibukiaki, na janchadan**

- 20 “Badi ichapa jiwekubidankin  
 en jancha ninkakatsi ikama man ea danankubidaniki.  
 Januxun matun ea yuikin:  
 ‘Jehová en duawakatsi ikamaki’, ibiatan  
 mati keyatapa tibi inun,  
 ji ewapa tupanyan naman tibi anu  
 yushibu dami bebun danti iki  
 beti ixun man chutamakin akawakubainmiski.
- 21 Uva nishi pepa katutan en matu banakin akawaniki, jiwemakinan.  
 Jakia pepa ibiani chakabui man pikukunkainaiwen taea  
 en matu unanbiani ikis man tsuabuda en ana matu unanmaki.
- 22 Lejia inun jabón ichapajaidawen man chakabumis daxkijaidabiakin  
 matun chakabu meshu detsis keska  
 ea bebunua man tuxkutidumaki.  
 Ea en Jehován en chanima janchawen en matu mestenwaiin”, iki en  
 jaskaya
- 23 matu iki: “ ‘Nukudan, nun jawa meshu detsismaki.  
 Yushibubu chani nun kenwainsmaki’, ikin man yuibiaidan,  
 paxku napaku anuxun june chakabu jawada man akubainima  
 shinankanwen.

Chakabu dasibi man akubainmis uinkin shinankubainkanwen.  
Camella yuxan depesekeuma jamebi nia ishchuakeakemis keskakin  
chakabu man chibanmiski.

- 24 Asna yuxan inama mati matipa anu nia  
jimi iki jawen bene benai kaxamis keskakin  
chakabu bechipaikin man benakubainmisbuki.  
Yuxan jimi ikin jawen benewen kemuai tsuan meketiduma keskakin  
chakabuwen man kemukunkainmiski.  
Yuxan jimi ikai benen xetekin benabaunkin  
jin ikama jawaida jaki nukumis keskakin  
chakabun matu achimiski.

- 25 Israelin enabuun, nawan yushibubu jawaida chibain  
matun bichi tae sawediana ibubis kai ichakanikayamakanwen.  
Yushibubu kenwain sai sai iki  
matun jui menuyamakanwen, jamenan.  
Jakia matun ea yuikin:  
'Nun jaska jenetidumaki.  
Nawan yushibu betsa bechipaikin en beyawaniwen taea  
jatube nia en ikaii', man imiski", iwanan,

**Israelin enabu atimapa jiweabuwen taexun  
Jehová n jatu kupixanikiaki, na janchadan**

- 26 "Yumetsu bechixun chiteabu dakemis keskai Israelin enabudan,  
jaska keskai man dakekunkainxanaai.  
Ja maewan anu man jiweabu inun, matun xanen ibujaidabu inun,  
matun xanen ibu bexmasbu inun,  
matunabu ebe janchaxunikabu inun,  
en jancha yuixunikabu man dakekunkainxanaai.
- 27 Ji senke dami wakin juni wanibu yuikin:  
'Miadan, min en epaki', akin  
mishki dami wakin ainbu wanibu yuikin:  
'Miadan, min en ewaki', akin jabu jaska wabiakin  
jamen eki ikidan, eki pechitan  
ea bechankamexun uinmaismabia  
janu chakabu matu anu juaitian datekin ea yuikin:  
'Jatu nemakin nuku mekei menan judiwe',  
ikin man ea kenamisbuki.
- 28 Judán enabuun, ¿jania matun mekenika dami man  
akubainimadan?  
Matun mae tibi anu yushibu midima man jayaki.  
Matu ichakawai beaibun

- ¿matun yushibu damipan matu medabewakin matu paxawai betidubumen?
- 29 Dasibibu man eki ja imisbuki,  
eki sinatai ea danan paepawaidan.  
Ea en Jehován en chanima janchawen en matu mestenwaiin.
- 30 Matun bakebu en jatu yusinbia jawa tapianbumabiaken jamen en jatu kupimiski.  
Matudan, pubenepa man inu betsa león keskabuki.  
En jancha yuixunikabu en matu yunua jatuki sinatakin man jatu tenankubainmisbuki.
- 31 Ja dikabi man ikis jiweabudan,  
pestan Jehován jancha ninkakanwen.  
Israelin enabuun, eadan, man ea uianan,  
¿en janu tsua jiweabumanu keskamen, jawa jayamadan?  
¿Mai anu badi pexeama  
en matu anua junea keskamen?  
En jaska matu ixuinsmaki.  
Enabuun, ¿jaskai jancha chakabukin yuikin:  
‘Nukun yununika nun jayamawen taea  
mia anu nun ana chintunkatsi ikamaki’,  
man ikunkainai?
- 32 Chipash beneyai kakinan,  
¿jawen dauti jawendua saweidan, jakimatidumen?  
Jakimatidumajaidaki.  
Jamen man enabudan, badi ichapa kakunkainkin man ea jakimakunkainaii.
- 33 Jawada chakabuwen kemui bechipaikin benabaunkin beya chakabu tibi man unanjaidakubainaii.  
Januxun chakabu tapiainbu anua man jatun yusinanki.
- 34 Jawada yudabun chakabuwaibuki nukutan jatu chiteamabia nuitapaibu inun pepabu detekin tenankubaini matun tadi jimiwen man iduma keskaki.
- 35 Man jaskabiakunkainmis ibubis yuikin:  
‘En jawa jatu chakabuwaismaki.  
Eki jawa Dios sinatama ixanikiki’, ikin man junebiakubainmis uinxankanwen.  
Eanan, xabakabi en matu unanti waxanaii,  
man pemenkain, man chakabumenkainan,  
jawen taexun matu kupikatsidan.
- 36 ¿Jaskai jawaida man medabenanti betsa benamisbumen?  
Ja Asiria nawabun matu ana medabewatiduma babushinabun



jaska jau Egipto nawabun matu medabewanunbun  
man benaibudan, babudixankanikiki.

- <sup>37</sup> Egipto nawabun matu medabewamawen taea  
dakeyabi jabun mai pakea anua man chintunxanii.  
Jatuki chiti iki jatu jaibuwanun ika man ibiaya  
en jatu matu dananma man jatube jaibunameama ixanai”,  
akin Jehován jatu yuinikiaki.

\*\*\*\*\*

**Jhován jancha Israelin enabun ninkama  
ikubidanibukiaki, na janchadan**

- 6** <sup>16</sup> Israelin enabu Jehován ana jatu yuikin:  
“Bai xexa dabe anu kai niti ixun uinkanwen.  
Jadatu bai jashu pepa matun xenipabun unanibu jatu yukakanwen.  
Ja bai pepa bechitan jawen kai janu matun yushin juindukunxanai  
anu  
man jaki nukuxanai”, en matu wabia  
matun ea kemakin yuikin:  
“Jaskamaki. Ja baiwen nun ana kakatsi ikamaki”, man ikaya

- <sup>17</sup> Jehován jawen uinika matu waxuntan jatu nichintan Israelin enabu  
yuikin:

“Matuki sinataibu beaibu matu unanmakin  
ja uinikatun jawen trompeta chan chan akaya  
ninka besti mapuyamakubainxankanwen”, jatu wa  
jakia ja junibun kemakin ea yuikin:  
“Jawen unanmati nuku jaskawen chaniai nun ana ninkakatsi  
ikamaki”, ikaibun

- <sup>18</sup> jaskaibuwen taexun Jehován nawabu yuikin:  
“Enabu Israelbudan, jaska en jatu axanai man unanxanunbun  
matu yuinun ea ninkakanwen.  
<sup>19</sup> Mai jidabi anu jiweabuun, ea ninkaidakanwen.  
En yunuti jancha inun en nemati jancha danankin  
en jancha en jatu yuikubidani  
jawa tapinsbumawen taexun  
jawada jabun bechipaisbuma  
chakabu atimapa jatu anu en yunuxanaii.  
Jabu yubakai peama juni chakabu yubakamisbu keskai  
atimapanibuwen taexun jatun chakabu jakimakatsis ikama  
en jatu ichakawaxanaii.  
<sup>20</sup> Sabá mai pakea anua xeni ininipa inun

mai pakea betsa chaikēa miban jua ininjaida  
 ¿jaskakin man ea bexunmisbumen, ea benimawanun, iwananan?  
 Ea duawanun, iwanan, en chi tapu anuxun inabu  
 man ea menuxunmisbu inun jawen xeni man ea kuaxunmisbudan,  
 ean en ja ana bechipai jawen benimamaki”, iwanan,

21 jaskawen taexun Jehován ana yuikin:

“Juti ikain jau di ikubainxanunbun  
 mishki keska jawada chakabu jatu bebun en datan  
 jatun ibubu inun, jatun juni bakebu inun,  
 jatu dapi jiweabu inun, jatun jaibuaibu di iki  
 jaliaswen mawaxankanikiki”, iwanan,

**Nortekidia detenamenikabu ichapajaida bekin  
 jatu achixankanikiaki, na janchadan**

22 Jehován ana yuikin:

“Chajaida mai pakea betsa nortekidia  
 nawa xukua betsa kushipa betsajaidabu benun,  
 iwanan, jatun detenameti pewakanikiki.

23 Pia midimaya inun jatun machatu chaipa kenujaidaya bei,  
 tsuawen nuisbuma pubenjaidabu, ianenwan buspu tsaubidanai  
 keskai  
 sai sai ikubidani caballoki katsaumebidanxankanikiki,  
 Davidin mae Sión detetan achinun ika beidan”, jatu wa

24 Jerusalén anuxun yudan kaianen yuikin:

“Mesejaida beai uatian nun ninkashinaki.  
 Datei punu nukai nun ana jawa kushipa jayamaki.  
 Ainbu bake kain isinmis keskai  
 itimaskai nun isin tenejaidaii.

25 Nukuki sinataibu jatun detenametiya mae tibi anua  
 mese meseaibuwen taea  
 ¡matun bai anu ana taxnibainyamakanwen!  
 ¡Jamapai bai tibiwen ana mapuyamakanwen!” ikaibun

26 ean jatu yuikin:

“Man en mae en matu bechipaiaidan, man ea peidaxunxankanwan.  
 Detekin yamawanun ika  
 nuku anu bei jawaidabidanxanaibuwen taexun  
 jawen bika teneai uinmati  
 tadi bexa sawetan chi mapu dapuxeketan  
 matun juni bake bestichai mawaken

man kaxai bis bis itidu keskai kaxajaidakubainkanwen”,  
en jatu waya

<sup>27</sup>Januxun Jehován ea yuikin: “Enabu min jatu unanti wakubainxanun  
en mia yunuaii. Jaska en jatu yunua ikaibu jaskada jatun shinanmenkain,  
uinkin ea jatu unantijaida waxunxanwen”, ea wa

<sup>28</sup>ean kemakin yuikin:

“Jehováan, ja dasibi yudabunan, tsuan ninkaisbumaki.  
Yuananain atimapai jiweabuki.  
Jatun shinan kushijaidabuki,  
mane bronze inun due keskabudan.

<sup>29</sup>Shunbun jawen detsis bikatsi chi ji akin kukatsa akin kuajaidatan  
jawen tane bemakis nunua bewetan udenkin  
shunbun jas wamisbu keska wakín  
jatu bika tenejaidamakin min jatu pewapanan  
jatun chakabu putaisbumaki.

<sup>30</sup>Jehováan, min ma jatu putawen taexun  
minabu jatu metukin yuikin:  
‘Plata detsisya dananmisbu keskabuki’,  
akin jatu kenakubainxankanikiki.”

**Jehová kenwanti jiwe jemaintin anua Jeremías  
jatuki chaninikiaki, na janchadan**

**7** <sup>1</sup>Jehován Jeremías yunukin yuikin: <sup>2</sup>“En kenwanti jiwe jemaintin  
xui dapi nixun na jancha jatu yusinkin jatu ninkamatanwen. Man  
dasibi Judán enabuun, man Jehová jabun kenwanun ika jikiaibudan,  
<sup>3</sup>eska Israelin enabun mekenika Dios Jehová kushipajaida dasibi  
binuatun jancha ninkakanwen: ‘Jaska man jiwekunkainai inun jaska man  
akubainai pewakubainxankanwen. Man jaska waya na mai pakea anu en  
matu jiwemakubainxanaii, jawa mai pakea betsa anu matu yunuamadan.  
<sup>4</sup>Tsuanda matu padankin yuikin: ¡Jehová kenwanti jiwedan, nenuki!  
¡Jehová kenwanti jiwedan, nenuki! ¡Jehová kenwanti jiwe nenuwen taea  
dateyamaxankanwen!’ ikaibu ja padananainbu ikunwankin jawa jatu  
ninkayamakanwen.

<sup>5-6</sup>Betsabube ana jatube padanananbukuanma, inun matunabuma beaibu  
ana jawa jatu ichakawama inun, bake ibuuma inun ainbu beneuma ana jatu  
ichakawama inun, na nenu jiweabu yudabun jawa chakabuwabuma detekin  
ana tenanma inun, ibubis chakabui atimapakin yushibu dami betsa ana  
kenwanma inun, matun jiwea man pewakubainai inun, jaska man ikunkainai  
shinan betsatan man pepaibudan, <sup>7</sup>na mai anu jawa jeneama matun xenipabu  
en jatu ibuwamani anu man jiwedan, en matu jiwemakubainxanaii.

<sup>8</sup>Jamen padan jancha jawamabiaken jatu ikunwankin man ninkakubainmisbuki, <sup>9</sup>eska tibi meidan, yumetsukubainidan, juni betsa tenankinan, ainbu betsa beneya chutakinan, yuda betsaki jamen chanichakaidan, yushibu Baal kenwankin xeni ininipa kuaxunkinan, jaska en matu nemajaidabianiken yushibu betsa betsapabu bechipaikin kenwankinan. <sup>10</sup>Man jaskabiai na en kenwanti jiwe en medibi wani anu ea bebun nixun ea yukanun ika man bebidan bebidanmisbuki, ‘En mekei pea jiweaki’, ikadan. Jakia jaska en bechipaiaama chakabu betsa betsapa man akubainai ean en ana tenetidumaki. <sup>11</sup>¿Na kenwanti jiwe en medibi wabianiken ikis yumetsubun jiwe keska wakin ichakawakin man ea shinanmismen? Dasibi man jaska wakubainaidan, en matu uinkubainaii. Ea en Jehován en chanima janchawen en matu mestenwaiin. <sup>12</sup>Ja dikabi ja mae Siló ena wakin katutan janu dukun eki nukuti tadi jiwe en jatu puntemani anu janu buxun uintankanwen, en jaska wanimenkainan, Israelin enabu ja Siló mae anuxun chakabuwaibuwen taexunan. <sup>13</sup>Man chakabu betsa betsapa wai matu shinan betsawamakin en matu yuibiakubaina man ea ninkakatsi ikama iniki, ea jawa kemamadan. Ea en Jehován en chanima janchawen en matu mestenwaiin. <sup>14</sup>Jaskawen taexun ja en kenwanti jiwe medibi Siló anua en chakabuwani keska wakin matun xenipabu inun matubu na en kenwanti jiwe matu medibi wamatan en kena en netani ja man jaki chiti ikabu jabiaskadi wakin en chakabuwaxanaii. <sup>15</sup>Matu jaska besti wama ea bebunua matu putakin chajaida en matu nichinxanaii, Efraínen enabun ea ana chibanbuma en jatu nichini keska wadiakinan”, iwanan,

### Israelin enabun Jehová sinatamanibukiaki, na janchadan

<sup>16</sup>“Jeremíasiin, mianan, na yudabukidi ea yukakin ana ea jancha wayamaxanwen. Jatuwen dabanan ikin ea ea ayamawe. Jatuwen nui ekidi jatu janchaxunyamawe. Jatukidi en mia ninkamawen taexun jawenchains yukakin ea bika wayamaxanwen. <sup>17</sup>Judán enabun mae tibi anuxun inun Jerusalén anuxun jaska jabun akaibu ¿min jatu uianmamen? <sup>18</sup>Bake mishtinbun kadu metax ichawakin manchiainbun jatun ibu junibun chi keti waibun ainbuaibun xekiwan trigo dudu misi wakatsi pewakin kamuskin texwaxun misi watan dami yushibu ainbu jawen kena Nai Xanen Ibu jawen dami bebunxun kenwankin ja misi inankubainmisbuki. Jaska wakin ea danankin nawabun yushibubu kenwankin uva vino inain man eki sinatamisbuki. <sup>19</sup>Jakia eki sinatabiai eki sinatama jaskaidan, ibubis jatumebi daketapai ichakanikakubainmisbuki. Ea en Jehován en jancha en mestenwaiin. <sup>20</sup>Jaskamisbuwen taea eadi bedukukaun jatuki en sinata paepai ea uinxankanikiki, na en kenwanti jiwe inun, na mae anu jiweabu inun, jatun inabu inun, jatun miban ji shadabu inun, jatun yunu tsekadiabuma

en kupixanaii, bai ewapa ketian ji ikainai tsuan nukawatiduma keska wakinan. Jaska Jehován chanima en matu yuiiai”, ikin

<sup>21</sup> Israelin enabu mekenika Dios Jehová kushipajaida dasibi binu keyuatun jawenabu yuikin: “Ea jawen kenwankin ina jidabi menukin keyukubainkin chaxuwan tesenxun jawen bichi dashpexun jawen nami xatexun jati man akatsi ikai ea benimawakin jawen xeni menu keyukin jawen nami pichanxun pikubainxankanwen, en jatu aniki. <sup>22</sup> Jakia Egipto anua matun xenipabu en jatu taxnimabidanaitian Mati Sinaí anuxun inabu jidabi menukin keyutidubu inun chaxuwan xeni kuantan jawen nami juatan pitidubukidi yunukin en jatu yuidiama <sup>23</sup> jau ea dukun ninkakubainxanunbun en jatu yunukin taewaniki. Jaska en jatu yunua akubainaibu enabu jatu watan jatun mekenika Dios en ikunkainxanaii”, iwanan, “en jatu yuiniki, jau jabu ea jiwei pexunkubainxanunbunan. <sup>24</sup> En jatu jaska wabiani en jaska bechipaiai akin ea benimawama en jancha danankin jatun juinti kushi watan ea ninkama jatun chakabu putama jaska besti shinankin akatsi iki jiwekubainibuki. Ea anu ana chintuin bekatsi ikama chakabu jenekatsi ikama eki pechinibuki. <sup>25</sup> Egipto anua matun xenipabu taxnibidanibutian inun na jabiatandi en jancha yuixunikabu betsa betsapa en matu anu yunuakeakekubidanmiski. <sup>26</sup> Jakia matubun ea ninkakatsi ikama en jaska matu yunuai chibankin ea axuanma juinti kushijaidatan chakabuwakin matun xenipabu man binujaidaii”, iwanan,

<sup>27</sup> “Jeremíasiin, mia jawa ninkabumabiaken na en jancha jatu yuikubainxanwen. Mia jawa kemabumabiaken jui kushipawen jatu yuixanwen, <sup>28</sup> eska jatu wakinan: ‘Matun mekenika Dios Jehován matu yunubia ja yudabu man jiweabu matu pewapanan man ea jawa ninkakin chibainsbumaki. Matun jancha chanima matun kexa anu ana jayamajaidakiaki’, akin ea jatu yuixunxanwen”, akin Jehován ea yuimaki.

\*\*\*\*\*

### Mapu mabu wamisbu keska wakin Jehován yudabu adiatidukiaki, na janchadan

**18** <sup>1</sup> En Jeremías Jehován ana ea yunukin yuikin: <sup>2</sup> “Mapu mabu wanikan jiwe anu butukaintanwen, jadixun en jancha en mia yuiaidan”, ea wa <sup>3</sup> butukaini kai jawen sibirbaunti anu mapu wanika dayakunkainaiki en nukua <sup>4</sup> jawen taewen pema pema akin jeneama mapu pepa katuxun unpaxwen kacha atan jawen sibirbaunti tapu pishta anu mapu pan axun kenti wapaia ibubis chakabui payukuaya jabias mapu ana bena wakin ana kenti wakin jaska bechipaiai keska akai en uianyan

<sup>5</sup> januxun Jehován ea yuikin: <sup>6</sup> “¿Eanan, man Israelbudan, jaska keska en matu adiatidumamen, ja mapu mabu wanikan ja mapu kenti waxu keska wakinan? Man Israelbudan, man en meken anuki, ja mapu

mabu wanikan jawen mapu jawen mekenen tsuma keskadan. Ean matu jaska wakin en betsa watidu ea Jehován en jancha en mestenwaiin.

<sup>7</sup>Jamen tsuada xukua betsabu inun jatun xanen ibubu jawaida jaska shinanbumabiaken en kushipawen jatu bedankin en jatu di adiatiduki. Ja inun, jatun mae anua nichinkinan, jatu chakabuwakin en jatu yamawatiduki. <sup>8</sup>Jakia tsuada xukua betsabu inun jatun xanen ibubun shinan betsakin jatun chakabu jenetan pe shinain jiwekubainaibu jaska jatun kupiti en jatuki tanabiashina ja chakabu en jatu anu yunuama ixanaii. <sup>9</sup>Ja inun, xukua betsabu inun jatun xanen ibubu betsabukidi shinankin duawakin ewawakin en jatu kushipa watiduki. <sup>10</sup>Jamen nawa xukuabun chakabuwaibu en jatu nemabia en jancha danankin ninkabumaken jaska en jatu duawakatsi pewabiashina shinan betsa watan en ana jawa jatu inanma ixanaii.

<sup>11</sup>Jeremíasiin, Judán mai pakea anu jiwebaunabu inun Jerusalén anu jiweabu na jancha ea jatu yuixuntanwen, Jehován eska matu yuikiki, akinan. ‘Man jiwe chakamiswen taexun matu kupikatsi iki en matukidi yubakaii. Man jiwe chakakunkainai jenetan jaska man amis inun jaska man jiwemis jenei bextekedikanwen, shinan betsa waidan’, akin min ea jatu yuixunbia <sup>12</sup>jabun mia kemakin yuikin: ‘Jamen min jancha chakawayamawe. Jaska nun bechipaiai keska ma nun beyawani nun jiwekatsis ikaii, chakabubiai jawa jeneamadan’, mia waxankanikiki”, akin Jehován ea yuiniki.

\*\*\*\*\*

**Jatun nukun jiwea medabewai nun manakai  
jununbadikiaki, na janchadan**

**23** <sup>1</sup>Chanima Jehován yuikin: “Chaxuwan mekenikabun jaskakin en chaxuwan ea jatu pe mekexunabuma en chaxuwan janida bui besti dasibainmisbu keskai enabu Israelbu janida bui benumisbuki. ¡Ja chaxuwan mekenikabu peidaxankanwan!” iwanan,

<sup>2</sup>Israelin enabu mekenika Dios Jehován jawen chaxuwan uinxunkin mekenikabu jatu yuikin: “Enabu meke pewama ubisita wakin paxa wakin man jatu nichinmaki. Man jaska wakin jatu chakabuwakubidanimawen taexun en matu kupikin unanmaxanaii. Ea en Jehován en jancha en mestenwaiin. <sup>3</sup>Janida mae betsa anu en jatu jadi nichini bunibu anua jabu enabu texe jiweabu ana jatu ichawatan ean kayabis jatun mai pepa anu en ana jatu chintunwanxanaii, januxun jau ana jatun bake pakubainxanunbunan. <sup>4</sup>Jau ana datei jiweyamakubainunbun jatun mekenika tibi watan en jatu mekemaxanaii, jau jawa nuitapayamanunbunan. Ea en Jehován en jancha en mestenwaiin”, itan

- <sup>5</sup> chanima Jehován mestenwankin ana yuikin:  
 “Ja xaba betsatian xanen ibu jununbadikiki,  
 Davidin baba betsa xanen ibujaida en waxanaii,  
 jawen mai pakea anua jawen yunuti kushipawen unanepakin  
 jatu yunukin padanananma pepas wakubainxanikiki.
- <sup>6</sup> Ja xanen ibu kainkin jatu yunukubainaya  
 Judán enabu unanuma pe mekeaibun  
 ja dikabi Israelin enabu unanuma jiwekubainxankanikiki.  
 Ja xanen ibu kenakinan, ‘Nukun Xanen Ibu Kushipa Maemanikaki’,  
 akubainxankanikiki”, itan

<sup>7</sup>chanima Jehován ana yuikin: “Badi betsatian ana ekidi datan aki yubakama ixankanikiki, ‘Jhová jiweatun jawen kenawen Israelin enabu Egipto anua kainmabidaniki’, akin yuiamadan. <sup>8</sup>Ana jadia shinanma jakia Jhová datan akin yuikin: ‘Nawan mai pakea nortekidia inun nawan mai pakea betsa betsapa anu sa akin en jatu nichini anua Israelin enabu ana iwekin en jatu ichawaniwen taexun Jhová jiweatun kena en datan akaii’, ikin na jatun mai anu jiwexun besti jaska yui yubakakubainxankanikiki”, iniki.

\*\*\*\*\*

**Jaska Jeremíasin jatu yuia bechipaiama  
 tenankeanibukiaki, na janchadan**

**26** <sup>1</sup>Judán enabu mai pakea anu Josíasin juni bake Joaquim xanen ibui taekainaya Jeremías Jehován yunukin <sup>2</sup>yuikin: “Templo anuxun ea kenwain Judán enabun mai pakea jatun mae tibi anua bemisbu jatu yuinun ika en Templo jemaintin anu ka nixun ja jancha mia yuikin en mia yunushina dasibi jatu yuitanwen, jawa jancha betsa jeneamadan. <sup>3</sup>Jentsan, jaska mia ninkatan jatun chakabu jenexankanimenkainan. Jaskaibun ean jaska en shinanshina jatun chakabuwen taexun jatu kupiama en shinan betsa watiduki. <sup>4</sup>Eska Jehován matukidi yuikiki. Ea ninkakanwen: ‘Man ea ninkabuma inun jaska en matu yusini man akama <sup>5</sup>inun en dayadubu en jancha yuixunikabu en matu anu yunukubaina matu yusinbiabu man jawa ninkama en jancha man dananmisbuwen taexun <sup>6</sup>jaska Siló anuxun en tadi jiwe medibibiaken chakabuwakin en yamawani keska wakin na Templo jiwedi en jabiaskadi waxanaii. Mai jidabi anu nawa betsa betsapa xukuabu tibitun jau ja uinkin shinanpakexanunbun na maewan Jerusaléndi chakabuwakin en atimapa waxanaii. Jaska en jancha ea jatu yuixuntanwen’, ea wa”

<sup>7</sup>Templo jemaintin anu kaxun jabias jancha Jeremíasin jatu yui ai jawenabu Diosbe janchaxunikabu inun, Diosun jancha yuixunika

chakabubu inun, yudan kaianen ninkaibun <sup>8</sup>jaska Jehován yunuxu Jeremíasin jatu yuikin keyuaya Diosbe jawenabu janchaxunikabu inun, Diosun jancha yuixunika chakabubu inun, yudan kaianen jawen jancha ninkatan jaki sinatakin achixun yuikin: “Ibubis min janchawen taea min mawaii. <sup>9</sup>Siló anua yupukin atimapa wani keska wakin na Templo axanikiki. Ja inun, nukun maewan Jerusalén yamawakin keyuabu nenu yudabu ana jiweama ixankanikiki”, iwanan, dateama, “en Jehová janchaxunaii”, ikin “¿jaskakin ibubis min jaska jancha yuixumen?” akeakeabu Templo jemaintin anuxun dasibibun Jeremías kebaunxun

<sup>10</sup>Judán enabu xanen ibu inun xanen ibu bexmasbun ja jaska waibu ninkatan xanen ibujaidatun jiwe anua taxnibidani Templo jemaintin anu jikia jaskaibu unanti wanun ika janu jikiti xui jawen kenadan, “Bena” ja bebun tsauabun <sup>11</sup>Jeremías jatu bebun iwexun ja xanen ibubu inun yudan kaian dasibi ichabu jatu ninkamakin jawenabu Diosbe janchaxunikabu inun Diosun jancha yuixunika chakabubun jatu yuikin: “Na juninan, nukun maewan atimapa waxanaibukidi chanichakaxuwen taexun jatu yunukanwen, jau tenanunbunan, jaskai dasibibun ma nun ninkakanxuwen taexunan”, akaibun

<sup>12</sup>xanen ibubu inun yudan kaian Jeremíasin ana jatu yuikin: “Jaska na Templo inun nukun maewankidi en janchai man ninkaxudan, emebi en ikamaki. Jehován jawen kena kushipawen ea yunua jua en chanixuki. <sup>13</sup>Jaska man jiwe chakakunkainai inun jaska man atimapamis matun shinan betsa watan shinandikanwen. Matun mekenika Dios Jehován jancha ninkakin man akubainaya jaska en matu yuixu keska matu anu chakabu yunuama ixanikiaki. <sup>14</sup>Jamen ea akinan, jaska man ea wakatsis ikai ea adikanwen, en yuda en ma matu bexuankidan. <sup>15</sup>Jawen jancha xabakabi dasibi en matu yuinun chanima Jehován ea yunushinaki. Na en matu yuixu jaska shinankatsi ikama en jawamabiaken man ea tenanan, matubu inun nenu jiweabu matumebi man chakabu ikunkainxanaii. Shinaindakanwen”, jatu wa

<sup>16</sup>janua xanen ibubu inun yuda kaianen jawenabu Diosbe janchaxunikabu inun Diosun jancha yuixunika chakabubu jatu yuikin: “Nukun mekenan Jehován kena kushipawen nuku jancha waikiki. Ja juni jau tenanunbun jawawen taexun nun jatu yunutidumaki”, ikaibun

<sup>17</sup>anibu unanepabu ichabu anua betsa benikaun ja yudan kaian jatu yuikin: <sup>18</sup>“Judán enabu anua Ezequías xanen ibujaidakin jatu yunukubainaitian mae betsa Moreset anua yumeni Diosun jancha yuixunika Miqueasin Judán enabu Jehová janchaxunkin: ‘Eska Jehová kushipajaida dasibi binuatun matu yuikiki. Ninkakanwen:

Mati Sión betsaidan, janu dayati bai besti ixanikiki.  
Jerusalén tekei keyui di ika janus jawen mishki mania  
ikunkainxanikiki.



Templo mati anudan,  
chaka besti benei bexexanikiki', jatu waya

<sup>19</sup> ¿Xanen ibujaida Ezequías inun Judán enabun Miqueas tenanibumen? Jaska wamajaida inibuki. Jakia Jehováki datekin jau jatuwen nuinun xanen ibujaida Ezequíasin Jehová ea akimawen taexun jaska jatu yuima keska jatu anu chakabu Jehován yunuama inikiaki. Nukubudi jaskakatsi ikama ibubis chakabujaidakin Jeremías tenanyamanankanwen, ibubis chakabukin Dios sinatamamadan.

<sup>20</sup> Jamen betsadan maewan betsa Quiriat-jearim anua yumeni Semaíasin juni bake Diosun jancha yuixunika Urías Jehován kena kushipawen na maewan inun nukun mai pakeakidi chakabu jatu yuiniki, jaska Jeremíasin nuku yuiái keskadan. <sup>21</sup> Jaska Uríasin yuiái xanen ibujaida Joaquim inun, jawen medabewanikabu inun, jawen xanen ibu bexmasbun ninkaiibun Joaquimnen Urías jatu tenanmakatsi ikaya ninkakin tapintan datei Egipto anu Urías paxabiaken <sup>22</sup> Acborin juni bake Elnatán inun juni betsabun jau achixuntanunbun xanen ibu Joaquimnen jatu yunua <sup>23</sup> jadi buxun Urías achixuntankin iwexun xanen ibu Joaquim bebun nichianbu Joaquimnen jatu yunua Urías tenantan janu nuitapaibu mawa jatu putamisbu anu kini anu jawen yuda udenibukiaki", akin

<sup>24</sup> Safánen juni bake Ahicam Jeremías janchaxunaiwen taea jau yudan kaianen tenanunbun xanen ibubun Jeremías jatu yunuama inibukiaki.

\*\*\*\*\*

**Babilonia anu jatu iyunibu Jeremíasin jatu  
kene bumanikiaki, na janchadan**

**29** <sup>10</sup> Jehován jawenabukidi shinankin Jeremías eska yuimakin:  
“Babilonia anu man jiwei kani 70 año man ma jiweken

jaska yubakai en matuki tanani  
ja mae anu ana jadi matu imama Jerusalén anu  
en ana matu chintunmai kaii.

<sup>11</sup> Eanan, en matu unanjaidaii.

Jaska matu wakatsi en yubakanidan,  
jaskawen taea ana chakabuwen matu yubama  
dasibi jiwea pe matu inantan jawen matu benimajaidawakin  
en matu jiwemakubainxanaii.

Ea en Jehován en jancha en mestenwaiin.

<sup>12</sup> Ja en matu jaska waitianan,  
tsuada man ebe janchakin ea yukaya  
matu ninkakin en matu kemaxanaii.

<sup>13</sup> Tsuanda ea benai man eki nukuxanaii,  
matun juinti jidabiwen ea benai eki nuidan.

14 Chanima en matu medabewaya  
 man ana eki nukuxanaii.  
 Tsuan matu ana bika tenemama binumatan  
 betsajaida uinmakin en matu jiwemaxanaii.  
 Janida nawa xukuabu tibi anu sa iki  
 jatun mae tibi anu man bunibu  
 jadia matu ichawakin keyutan na mae anu  
 ana en matu chintunmaxanaii.  
 Ea Jehován en jancha en mestenwaiin”, inikiaki.

\*\*\*\*\*

**Janu Jehován jatu ibuwamani anu Israelin enabu  
 chintunbidanxankanikiaki, na janchadan**

**31** <sup>10-11</sup> “Nawa betsa betsa xukuabu tibibuun,  
 Jehován jancha ninkakanwen.  
 Ja inun, ianenwan kexa chajaidabiaken  
 janu jiweabu jatu banabimakubainxankanwen.  
 Nawa kushipajaidabu anua  
 Jacobun enabu taxnimakin  
 Jehován jatu iwekubidanxanaiwen taexun  
 Israelin enabu chajaida jatu nichinkin sa abianixun  
 jatu ana ichawaxun Jehován jatu mekekubainxanikiki,  
 chaxuwan mekenikatun jawen chaxuwan mekemis keska wakinan.

12 Mati Sión anu bei benimai  
 Israelin enabu kantanubidanxankanikiki.  
 Jehován jatu medabewa xekiwan trigo ichapa inun,  
 uva vino inun, piti xeni ichapa inun,  
 chaxuwan nami ichapa inun,  
 ina awa nami ichapa jayawen taea benimajaidakubidanxankanikiki.  
 Bai miban bana uian cha amis keska  
 Israelin enabu jatun kushipa  
 jawa ana benuama ikubainxankanikiki.

13 Chipashbu inun, bedunanbu inun,  
 anibubu benimai besi nawakubidanxankanikiki.  
 Nui kaxabiaibun jatu benimawakin  
 isin tenenbiaibun benima pae inankin  
 nuitapabiaibun en jatu daewakubainxanaii.

14 Jawenabu Diosbe janchaxunikabun  
 piti pepa pikubainxankanikiki.  
 En jatu duawaya piti jamen ikai  
 enabun yaniwakubainxankanikiki.

Ea en Jehován en janchawen en matu mestenwaiin”, iwanan,

15 ana Jehován yuikin:

“Nuijaidai kaxai bis bis ikaibu  
ja mae Ramá anuxun ninkaxankanikiki.  
Jacobun ain Raquelin enabu ainbuaibu  
jatun bakebuwen taea kaxa neseama  
jatun bakebu dasibi jayabumawen taea  
jawenabun jatu daewabiabu  
ninkama ixankanikiki”, iwanan,

16 januxun Jehován ana yuikin:

“Raquelin enabu ainbuaibuun,  
ana jamen kaxayamakanwen,  
matun beun jene jamen chakawaidan.  
Matuki sinataibun jatun mai pakea anua  
matun bakebu ana chintunxanaiwen taexun  
jatuwen nuijaidai inun man jatuwen isin tenejaidabiakunkainaidan,  
chipu matun manakuti man jayakunkainxanaii.  
Jaska ea en Jehován en janchawen en matu mestenwaiin.

17 Jaskaxanai manakubainxankanwen,

matun bakebu jatun mae anu ana chintunbidanxankanikikidan.  
Ea en Jehován en janchawen en matu mestenwaiin”, itan,

**Jaska taxnimaxanai yuba bena Jehován Israelin  
enabukidi yuiniikiaki, na janchadan**

27 Jehován ana jatu mestenwankin: “Uatian Israel mai pakea  
anu inun Judán mai pakea anu yudabu inun jatun inabu ichapa  
pakubainxankanikiki. 28 Ean jatu uinjaidakubainkin jatunabu en betseni  
inun, en jatu bedani inun, jatu putakin ichakawakin en jatu yamawaniki.  
Ean jatu jaska wabianixun en jatu uinkubainmiski. Natian jatu uindiakin  
en jatu medabewaxanaii, benikin ana jatu kushipawakin jatun mae  
ana inankin jatu bana bena wakin en akawaxanaii. Ea en Jehován en  
mestenwaiin.

29 ‘Uva bimi bunkash pia keska wakin jatun ibubun chakabuwanibu  
jatun xeta isin maxexkunkaini keskai jatun bakebu nuitapai bika  
tenekubainmisbuki’, akin ana jaska yuiama ixankanikiki. 30 Jakia  
tsuanda uva bimi bunkash pia jatun xeta maxexmis keskai ibubis jatun  
chakabuwen taea mawaxankanikiki”, iwanan,

31 Jehován ana jatu mestenwankin: “Jawatianda Israelbu inun Judán  
enabube en jatube ana yubakai benaxanaii. 32 Egipto anua jatun xenipabu  
iwekin en jatu metsunxun akawabidani en jatube yubakani keska en ana

akama ixanaii. En yubakati jancha jabun ea chakabuwanibuki, en jatun ibu kayabibiakenan. Jaskawen taea en jatube ana yubakai en benaxanaii. Ea en Jehován en jancha en mestenwaiin. <sup>33</sup>Jawatianda Israelin enabube eska ana yubakai en benaxanaii. En yusinti jancha jatun juinti anu mistua keska wakin jatun shinan medan en kenea keska waxanaii. Jatun mekenika Dios en ikunkainxanaii. Jabudan, enabu ikubainxankanikiki. Ea en Jehován en jancha en mestenwaiin. <sup>34</sup>En jatu jaska waiwen taexun jatun jaibuaibu inun jatunabu inun yuda betsabun ma ea unainbuwen taexun: ‘Ikunwankin Jehová unanwen’, iwanan, jatu ana yusianma ixankanikiki. Ma yununika xanen ibubu inun, yununika bexmasbu inun, dasibibun ea unainbuwen taexun ean jatun chakabu ana shinanma jatu buaxuntan en ana jatukidi yuiama ikunkainxanaii. Ea en Jehován en jancha en mestenwaiin”, akin jatu yuinikiaki.

\*\*\*\*\*

### Jeremíasin jancha Barucin kenexuntan Templo jiwe jemaintin anuxun jatu yuixunikiaki, na janchadan

**36** <sup>1</sup>Judán enabu yunui Josíasin juni bake Joaquim xanen ibujaidai ma 4 año kaitian Jehován Jeremías yunukin yuikin: <sup>2</sup>“Jaki keneti una sebi biwe. Ja bitanxun Israelin enabukidi inun, Judán enabukidi inun, nawa betsa betsapa xukuabu tibikidi en jancha dasibi en mia yuikubainima kenediwe, Josías xanen ibujaidaitian mibe janchai taekin en mia yui taewabidanimia kenetiyaxun akubainkin natian en mia yuidiashina kene keyukinan. <sup>3</sup>Judán enabu anu jatu anu chakabu betsa betsapa ea Jehován en jatu yunuti waima en shinankubainai jabun ninkaimaxun shinandiakubainkin jatun shinan betsa wakin jatun chakabu jenekin shinan betsa watidubumenkain. Jabun jaska wakin jatun shinan chakabu tibi jenekubainaibu jatun chakabu en jatu buaxunxanaii, ana shinanmadan”, aka

<sup>4</sup>Jeremíasin jawen kenexunika Neríasin juni bake Baruc kenatan yuikin: “Jaki keneti sebi bibidan jawada Jehován ea yuikubidanimia en mia yuia ea kenexundiwe”, aka jabiatandi Barucin Jeremíasin yuikubaina kenexunkubainkin atimas keyuxuna <sup>5</sup>januxun Jeremíasin Baruc yunukin yuikin: “Uinwen. Jehová kenwanti jiwe jemaintin anu ka en jkipanan ea nemamisbuki. <sup>6</sup>Jaskawen taea ja xaba betsatian Jerusalén anu jiweabu inun Judán enabun mai pakea anu mae betsa betsapa anu jiweabu jabu samakei ichaibutian Templo jemaintin anu kaxun janu ichai beshianbu dasibibun Jehován jancha jau ninkanunbun ja en mia yuia una sebiki min kenekubainshina jui kushipawen jatu ea yuixunxanwen. <sup>7</sup>Jhován jatu kupikatsi jatuki sinatajaidakin jatu datekin mesejaidawaiwen taexun ja yudabu chakabujaidabiakin jatun shinan betsa watan jatun chakabu jenei: ‘Jau ewen nuinun’, ixun Jehovákidi shinankin yukaxankanimenkain. Min jaska jatu

yuixuntiduki”, aka <sup>8</sup>jaska Diosun jancha yuixunika Jeremíasin yunushina Jehován jancha una sebiki kene keyushinxun Barucin jatu yuixunun ika kaxun

<sup>9</sup>Judán enabu mai pakea anuxun jatu yunui Josíasin juni bake Joaquim xanen ibujaidai ma 5 año inun 9 uxe kaitian Jerusalén anua inun mae betsa betsapa anua Templo jemaintin anu icha Jehová bebunua samekeabun <sup>10</sup>Templo jemaintin jikiti xui jawen kena “Beputi Bena” ukedia anu kenenika Safánen juni bake Guemarásin dintu manaundi Baruc mapeketan janu uinti xui anu nixun Jeremíasin jancha una sebiki kenamashina dasibi yudabu janu ichai keyuxun ninkaibu anu jui kushipawen Barucin jatu yuixunkubainkin jeneaya

**Xanen ibujaidatun yununikabu jabias jancha  
Barucin jatu yuixunikiaki, na janchadan**

<sup>11</sup>Jhován jancha Barucin jatu yuiai Safánen baba Guemarásin juni bake Micaíasin ninka keyubain <sup>12</sup>xanen ibujaidatun jiwe anu kai kenexunika xanenibun dintu janu xanenibun yununikabu inun, kenexunika Elisamá inun, Semafásin juni bake Delaías inun, Acborin juni bake Elnatán inun, Safánen juni bake Guemarásin inun, Hananíasin juni bake Sedequías inun, yununika betsabu janu ichabu anu jikixun <sup>13</sup>dasibi yudan kaian Barucin jatu yuixunai ninka keyutanxu Micaíasin jatu yuikin keyua <sup>14</sup>ja una sebi yudabu bebunxun jatu yuixu jau jatu anudi bexun jau jabudi yuixundiayunun Baruc iwemakin xanen ibu betsan Cusín juni bake Selemíasin baba Netaníasin juni bake Jehudí yunuabu kaxun Baruc yuia una sebi bixun tsumabaini jatu bebun Baruc ni tushiaya <sup>15</sup>jabun yuikin:

—Tsautan ja una sebi anua ja jancha nukudi yuixunwen— akabu januxun Barucin jatu yuixunai <sup>16</sup>ninkai jawen datejaidai beisanan akeaketan Baruc ana yuikin:

—Na jaska jancha dasibi nun ninkaidan, nukun xanen ibujaida Joaquim yuinun kawé— iwanan,

<sup>17</sup>jabun Baruc yukakin:

—Na jaska jancha kenekinan, jaska watan min kene keyushina nuku yuiwe— akabu

<sup>18</sup>Barucin jatu kemakin:

—Na jancha dasibi ibubis Jeremíasin ea yuikubaina na una sebiki tintawen kenexunkubainkin atimas en keyushinaki— jatu wa

<sup>19</sup>januxun jabun Baruc yuikin:

—Na jaskawen taeadan, idui mia inun Jeremías janida butankanwen, jau tsuan matu unanyamanunbun juneidan— akabu, junetanun ika Baruc kaken

**Jeremíasin jancha una sebiki keneshina Joaquimnen  
kua keyunikiaki, na janchadan**

<sup>20</sup>xanen ibu kenexunika Elisamán dintu anu Jeremíasin jancha una sebi xanen ibu bexmasbun janabain xanen ibujaidaki chanitanun ika

Joaquim anu bui jikixun jaska ninkakanxu dasibi yuiabu <sup>21</sup>ninkatan kenexunika Elisamán dintu anua jau ja una sebi bitanun xanen ibujaida Joaquinmen Jehudí yunua kaxun bitanxun xanen ibujaida inun xanen ibu yununika bexmasbu mapubaunabu anuxun Jeremíasin jancha Jehudín jatu yuixunkubainaya <sup>22</sup>ma matsitian ja uxe 9 kaya dintu uke medan mai xantu anu janu chi deken kuaxunkubainmisbu dapi jadi xanen ibujaida Joaquim tsauken <sup>23</sup>Jehudín jatu yuixunkubainkin 3 pakea kasmai 4 pakea yui keyuaya Joaquinmen jawen nupewen mextexun chi anu napua menuaya Jehudín ana yuixunkubaina jabiaskas wakin nupewen ana mextexun chi anu napukin menukubainkin Jeremíasin jancha una sebi atimas Joaquinmen menukin yamawakin keyuaya <sup>24</sup>xanen ibujaida inun xanen ibu yununika bexmasbun Jeremíasin jancha dasibi ninka keyubiatan jaska jawen janchawen dateabuma inun jawa bika teneamawen taexun jatun tadi jawa ushniama inibukiaki. <sup>25</sup>Una sebi jau mextetan kuakin jaska wayamanun Elnatán inun, Delaías inun, Guemarásin nemabiabu Joaquinmen jawa jatu ninkamajaida kuakubainkin keyunikiaki. <sup>26</sup>Jakia Diosun jancha yuixunika Jeremías inun jawen kenexunika Baruc jau achitanunbun jawen bake Jerahmeel inun, Azrielin juni bake Seraías inun, Abdeelin juni bake Selemías xanen ibujaida Joaquinmen jatu yunua buxun benajaidabiabaunabu Jeremías inun Baruc medabewakin Jehován jatu junenikiaki.

**Jeremíasin ana yuia Barucin kene sebi bena wanikiaki, na janchadan**

<sup>27</sup>Xanen ibu Joaquinmen Jeremíasin jancha Barucin una sebiki kenexunshina kua keyushinken Jehován Jeremías ana yunukin yuikin: <sup>28</sup>“Una sebi betsa bitan ana jaki kene bena wawe, jaska ja dukun bebunkidi mia kenexunshina Judán enabu xanen ibujaida Joaquinmen kua keyushina keskadi wakinan. <sup>29</sup>Eska jakidi yuikinan: ‘Eska Jehován mia ana yuikiki: Na mai pakea anu yudabu inun inabu yamawakin chakabuwunun ika Babilonia xanen ibujaida jawa teama juxanikiki, mia medabewakin Jeremíasin mia kenexunbia jawen jancha ninkakatsi ikama min jaki ja ikin nemakin jawen jancha una sebi min kuanshinaki. <sup>30</sup>Min jaska washinawen taexun mia Judán enabu xanen ibujaida Joaquim ea Jehován mia yuikin: Jaska min xenipabu David xanen ibujaidai tsauni anu minabu ana tsauama ikubainxanikiki. Ja dikabi min mawa mia maiwama min yuda mia udenkin putabu badin mia kua inun meshu medan min yuda matsiwen min chapui keyuxanaii. <sup>31</sup>Min chakabuwen taexun mia inun minabu inun min dayadubu en mia jatube kupixanaii. Jaska bebunkidi en matu banabimabia man jawa ninkama ikubidanaibu keska matu inun Jerusalén anu jiweabu inun Judán enabu mai pakea anu jiweabuki jamapai chakabu atimapa betsa betsapa en yunukubainxanaii’ ”, atan Jehován Jeremías ma jaska yunuawen taexun

<sup>32</sup>una sebi betsa Jeremíasin bixun jawen kenexunika Baruc inantan Jeremíasin ana yuikubaina jawen jancha Barucin ana kenexunkubainkin

una sebiki ja dukun keneshina xanen ibujaida Joaquimnen kuashina keska jabias jancha kenekin keyua ja dikabi jancha betsa jabias keskadi Jeremíasin ana yuikin chichimakubaina Barucin kenekin keyuxunikiaki.

**Jehová jau yukaxunun xanen ibujaida Sedequíasin  
Jeremías ea anikiaki, na janchadan**

**37** <sup>1</sup>Joaquimnen juni bake Jeconías Judán enabu mai pakea anu jiweabu xanen ibubiaken achitan Josíasin juni bake betsa Sedequías jau ja jatun xanen ibunun, iwanan, Babilonia xanen ibujaida Nabucodonosorin Sedequías xanen ibu wabainimaken <sup>2</sup>jakia jaska jawen jancha Jehován Jeremías yuikin yunumakubainai keska Sedequías inun jawen yununika bexmasbu inun yudabun jawen jancha ninkakin jawa chibankin axuanbumaken

<sup>3</sup>jaskabiakin: “Jeremías uin butankanwen, jau nukukidi nukun mekenika Dios Jehová nukukidi janchaxununan”, iwanan, jau yuixuntanunbun Selemíasin juni bake Jucal inun Maasefasin juni bake jawenabu Diosbe janchaxunika Sofonías xanen ibujaida Sedequíasin jatu yunua buabu <sup>4</sup>jabiatiandi Jeremías achitan bichidiabuma jawa wabuma yudabu mapuabu anu nashui ika niaki jaki nukutan <sup>5</sup>janua jabiatiandi Egipto anua Faraónen detenamenikabu ichapa taxnibidankin Jerusalén medabewanun ika beaibu Caldea nawabu detenamenika ichapabun Jerusalén kebauni nati ixun jatu tsaka tsaka akaibun Egipto nawabu beaibu bana ninkatan jatube detenamakatsi ikama jatu jenebainibun

<sup>6</sup>janua Diosun jancha yuixunika Jeremías Jehován yununin ana yuikin: <sup>7</sup>“Ea Israelin enabu mekenika Dios Jehován eska en mia yuiiai. Jau ea yukanunbun Judán enabu xanen ibujaidatun jatu yunua beabu Sedequías eska ea yuixunwen: ‘Matu medabewanun ika Faraónen detenamenikabu ichapa taxnibiabidani beshianbu jatun mai pakea Egipto anu ma ana chintuanbuki. <sup>8</sup>Jakia Jerusalén achixun jatu detenun ika Caldea nawabu bebiashina ana bushianbudan, ja Caldea nawabu ana Jerusalén anu bexankanikiki. Jaskabidan ja maewan achi keyutan chiwen kuaxankanikiki. <sup>9</sup>Ea en Jehován bebunkidi en matu yuiiai ea ninkakanwen. Caldea nawa detenamenikabu ma bushianbu ana beabuamaki, iwanan, ikonwankin jaska shinanyamakanwen. Chanima ana bexankanikiki. <sup>10</sup>Matu detenun ika Caldea nawa detenamenikabu dasibi ana beabu man jatu detekin keyutiduki. Jakia man jatidi jatu detechaka jabu mawama isin tenei maniabu xuxai shinan mestenwantan benibaun ana bei jikixun matun maewan kuakin keyuxankanikiki’, akin na jaska jancha ea jatu yuixunwen”, aka

**Bichiti jiwe medan Jeremías bichinibukiaki, na janchadan**

<sup>11</sup>Faraónen detenamenika ichapabu beaibu Caldea nawabun ninkatan Jerusalén dapikea Caldea nawabun jatu jenebaini ma bushianbun <sup>12</sup>Benjamínen enabun mai pakea anuxun jawen betsabun mai paxkaimabu jawenadi ibu watan janu paketan jiwunun ika Jerusalén

anua Jeremías taxninun ika kaya <sup>13</sup>janu jikiti xui jawen kena “Benjamín” anu kematanaya Hananíasin baba, Selemíasin bake jawen kena “Írías” jikiti xui mekenikabu jatun xanen ibun Jeremías niti atan ja akin yuikin:

—¿Caldea nawabuki min jatuki dasi kائي!— aka

<sup>14</sup>Jeremíasin kemakin yuikin:

—¿En jadi jaska kainamaki, Caldea nawabu anu kaidan!— aka jaska wabia ninkamas Jeremías achitan xanen ibu bexmasbu anu iyuxun jatu yuikin: <sup>15</sup>“Taxnikainun ikaya en iwexuki”, jatu wa jabu Jeremíasiki sinatajaidakin jau bichinunbun xanen ibu bexmasbun jatu yunua kusha kusha atan kenexunika Jonatánen jiwebiaken ma bichiti jiwe washianbu anu iyuxun bichiabu <sup>16</sup>jiwe naman mai medan dintu pishta meshu ten ikai anu nichinxun mekeabu xaba ichapa jadi Jeremías ikunkainaya

<sup>17</sup>januxun jau bichiti jiwe anua Jeremías kainmabainkin jawen jiwe ewapa jawendua anu jau iwenunbun xanen ibujaida Sedequíasin jatu yunua bichiti jiwe anua iweabu Sedequíasin Jeremías june yukakin:

—¿Jehován jancha kaka bena min ana jayamen?— aka

Jeremíasin kemakin yuikin:

—Jaa. Min eskakiaki, en mia yuiái ninkawe. Min pemaki. Babilonia xanen ibujaidatun mia achixanikiki— atan

<sup>18</sup>Jeremíasin jatundi yukakin:

—¿Ja bichiti jiwe anu jawawen dabanán ea bichimabumen? ¿Mikidi jawa chakabujaida en akimamen? ¿Min yununika bexmasbukidi jawa chakabujaida en adiaimamen? ¿Tsua nukunabu en chakabuwaimamen? Jawa matukidi chakabu en jayamaki. <sup>19</sup>Ja dikabi Diosun jancha yuixunikabu chanichakakin matu yuikin: “Babilonia xanen ibujaidatun jawen detenikabu iwexun matu inun matun mai pakea matu detei nenu beama ixankanikiki”, akin matu yuikubainaibudan, ¿janía jabudan?

<sup>20</sup>Xanen ibuun, en mia medabe yukaii. ¿Min ea axuntidumen? Jadia en mawayamanun Jonatánen jiwe anu ea ana jatu yunuyamawe— abia

<sup>21</sup>ninkatan xanen ibun jiwe jawendua mekenikabun jemaintin kenekauna anu mekexun xaba tibi misi ewapa bestichai jau inankubainunbun xanen ibujaida Sedequíasin jatu yunua jadixun mekekubainkin misi jayayuken Misi Wanikabun Bai anua xaba tibi misi ewapa bestichai bexunbidanbidanabu xanen ibun jiwe jawendua mekenikabun jemaintin kenekauna anu Jeremías jiweyuken,

**Unpax pukin kini keyatapa pupus medan Jeremías dispiwen butebiashinabun ana mapemanibukiaki, na janchadan**

**38** <sup>1-3</sup>Jeremíasin yudan kaian yuikin: “Eska Jehován matukidi yuikiki: ‘Na maewan anu bashikuaibu machatu chaipa kenujaidawen kasmai, buni paepawen kasmai, isin paepawen jaska



tibiwen man mawatidubuki. Jamen matun yuda mekei Caldea nawabube man jatube kaidan, man jabun matun jiwea meketidubuki. Ja inun, na maewan Jerusalén Babilonia xanen ibujaidatun detenamenikabun matu binui bexankanikiki, tsuan jawa matu nemaxuntidumadan’ ”, jatu akai Matánen juni bake Sefatías inun, Pashurin juni bake Guedalías inun, Selemíasin juni bake Jucal inun, Malquíasin juni bake Pashur betsan Jeremíasin jancha jabun ninkabain

<sup>4</sup>janua jabu xanen ibu bexmasbu jatun xanen ibujaida anu buxun yuikin:

—Nukun detenamenikabu inun nukunabu nenu jiwewuabun Jeremíasin jancha ninkai datemisbuwen taexun ja juni jau tenanunbunwen. Nukunabu jancha pewama jatu jancha chakabu besti yuikin mesewakubainmiski— akabu

<sup>5</sup>kemakin Sedequíasin jatu yuikin:

—Peki. Jaska man akatsis ikai ja juni akanwen, matunakidan— jatu wa

<sup>6</sup>jaska jatu shinanmaiwen taexun Jeremías achixun xanen ibujaidatun jiwe mekenikabun jemaintin kenekauna anu xanenibun juni bake Malquíasin unpax wakini mai kini keyatapa wanibu unpax jayama anu mistukin dispiwen buteabu uke medan pupusjaida anu Jeremías pukuabu seukua niken

<sup>7</sup>Etiopía nawa betsa jawen kena Ébed-mélecdan, xanen ibujaida Sedequíasin jiwe jawendua anuxun dasibibun bechipaimisbu unpax aduti kini keyatapa anu Jeremías ma mistukin bichiabu ninkatan jabiatandi Benjamínen enabun mai pakeakidi jikiti xui beputikidi xanen ibujaida Sedequíasin junibube icha tsauken <sup>8</sup>xanen ibujaidatun jiwe jawendua anua Ébed-mélec kainkaini Sedequíasin anu kaxun june baxexen yuikin:

<sup>9</sup>—En xanen ibuun, ¿mibe janchapa?— aka

—Peki. Jaskadamenkain, ea yuiwe— aka

Ébed-mélecin unanxubida yuikin:

—Jaska Jeremías ja junibun ashianbudan, chakabujaidaki. Unpax aduti kini keyatapa pupus besti anu nichinshinabu jadia buni mawaya nukun mae ewapa anu ana misi jayamaki— aka

<sup>10</sup>jaska wa shinantan Sedequíasin yunukin:

—Chanima chakabuki. Jawaida 30 juni iyuxun ja unpax kini keyatapa anua Jeremías janun mawanun jatu mapemamatanwen— aka <sup>11</sup>Ébed-mélecin 30 junibu katuxun xanen ibujaidatun jiwe anu tadi aduti dintu anu jikixun janua tadi xeni katubain ja unpax kini keyatapa anu kaxun dispiwen tadi bunexkin mestenwantan Jeremías anu paninwanxuntan <sup>12</sup>yuikin:

—Dispiwen besti min nexea min isintiduki. Tadiwen besti pishkanwemetan dispi tsumawe, nun mia mapemaidan— akabu jaska yunuabu Jeremías jaskaya <sup>13</sup>januxun juni kushipabun ninibidankin Jeremías mapemabu janua xanen ibujaidatun jiwe jawendua

mekenikabun jemaintin kenekauna anu Jeremías nichianbu janu jiweyuken

**Sedequíás Jeremíasbe june janchanikiaki, na janchadan**

<sup>14</sup>Diosun jancha yuixunika Jeremías jau ea anu iwenunbun, iwanan, jatu yunua Jehová kenwanti Templo jemaintin mishkiwen kenebaunibu inun jikiti xui tibi betsa 3 anu dintu pishta manaundi iyuxun Sedequíás bebun nichintan buaibun tsuan ninkama xanen ibujaidatun Jeremías yuikin:

—Jawadakidi en mia yuka juneama xabakabi chanimajaida jancha besti ea yuiwe, jawa ea padanmadan— aka

<sup>15</sup>Jeremíasin kemakin yuikin:

—Min jaskakidi ea yukai xabakabi en mia yuiyadan, eki sinatakin jau ea tenanunbun min ea jatu yunuxanai. Ja inun, Diosun jancha xabakabi en mia yusinbia jawa ea ninkakin min shinan betsa wama ixanai— aka

<sup>16</sup>jakia june yubakin Sedequíásin Jeremías jancha wakin yuikin:

—Jehován nuku jiwea inanmiswen taexun en mia yubaii. Min ea xabakabi yuibiaya jau mia tenanunbun en mia jatu yunu taskama ixanai. Ja dikabi jabun mia tenankatsis ikaibu anu en mia yunuama ixanai— aka

<sup>17</sup>jaska yubai ninkatan Jeremíasin yuikin:

—Israelin enabu mekenika Dios Jehová kushipajaida dasibi binuatun jancha en mia yuai ninkawe. Babilonia xanen ibujaidatun detenamenikabu xanen ibubu anu mia inun minabun yuda jawaida dateama min jatu inanainan, man mawama ixankanai. Ja inun, na maewan jawa kuabuma ixankanikiki. <sup>18</sup>Jamen min yuda min jatu inanmaken ja maewan Caldea nawabun jatun kushipawen achitan chiwen kuakin keyuxankanikiki. Miadan, min jaskatan paxatidumajaidaki— aka

<sup>19</sup>Sedequíásin kemakin yuikin:

—Enabu Judá jatidi Caldea nawabube jusiyamabuwen taea jatuwen en datejaidai. Jabun ea achitan ea ichakawachakayamatidubuki— aka

<sup>20</sup>Jeremíasin kemakin yuikin:

—Jaskamaki. Caldea nawabun mia jatu yunuabumaki. Jehován jancha en dama mia banabimaxu ja besti ninkakin chibanwen. Jaskatan pe jiwekaini min jawa mawama ixanai. <sup>21</sup>Jamen min yuda min jatu inankatsi ikamaken min jaskaxanaikidi Jehován ma ea uinmakin unanmashinaki. <sup>22</sup>Caldea nawabu na maewan anu jikixun Judán enabu xanen ibujaidatun jiwe jawendua anua ainbuaibu detenamenikabun jatu dasibibu achixun kainmatan Babilonia xanen ibujaidatun detenamenikabu xanen ibubu jatu inankin yunuabu ja ainbuaibun yuikin:

“Jawen jaibujaidatun padankubainkin

nukun xanen ibujaida maemamakanxuki.  
 Jawen tae pupus anu seukua keska  
 jaska katimaken jaki pechibainkin ma jenebainabuki”,

akin mikidi yuixankanikiki— atan

<sup>23</sup> Jeremíasin xanen ibu jancha jenediama yuikubainkin:

—Min ainbuaibu dasibi inun min bakebu dasibi Caldea nawabu jabu jatu inankin yunuxankanikiki. Jakia min xanen ibujaidabia min jawa paxama ixanaai. Mia achitan Babilonia xanen ibujaida anu mia nichintan min maewan chiwen kuakin keyuxankanikiki— aka

<sup>24</sup> Januxun Sedequíasin kemakin Jeremías yuikin:

—Min jiwea min mekekatsis ikaidan, na jaska shadabu jancha min ea yuixu tsua yuiyamaxanwen. <sup>25</sup> En mibe janchaxu en xanen ibu bexmasbun ninkabidan mia yukai bexankanikiki. Jabun mia akin: “¿Jaskada xanen ibujaida Sedequías min yuishinamen? Jamen jatunan, ¿jawa mia yuishinamen?” iwanan, “Man jaskada yubakashina dasibi nuku yuiwe. Nun mia yubaiwen taexun nun mia tenanmaki”, akin mia yukaxankanikiki. <sup>26</sup> Mia jaska wabiabu jatu kemakin eska jatu yuixanwen: “Jadia en mawayamanun Jonatánen jiwe anu ea ana yunuyamawe”, akin, “Jaska besti xanen ibujaida en ea ashianki”, akin jatu yuixanwen— abaini kashinken

<sup>27</sup> Sedequías Jeremíasbe janchashina ninkatan xanen ibubu bexmasbu dasibibun uintanun ika Jeremías anu buxun yukati betsa betsapa yukabiakubainabu, jaska Sedequíasin ma yunushina besti Jeremíasin jatu yuia jatun jancha tsuan ninkama ishianwen taexun Jeremías jawa wama unanuma jenebainabu <sup>28</sup> xanen ibujaidatun jiwe jawendua mekenikabun jemaintin kenebauni anu jabanus Jeremías jiweyukuken jabiatandi Caldea nawabu detenamenikabu bexun Jerusalén achinibukiaki.

**Atimas Jerusalén achinibukiaki, na janchadan**  
 (2 R 24.20–25.21; 2 Cr 36.17-21; Jer 52.3-30)

**39** <sup>1</sup> Judán enabu mai pakea anu Sedequías xanen ibujaida ikunkaini uxe 10 inun año 9 kaitian Jerusalén ana achikin jatu dete keyunun ika Nabucodonosorin jawen detenamenikabu dasibi iwei kematan Jerusalén jidabi kebauntan mae benanta jatun tadi jiwe puntebaunshinxun unanxubida jatu achikubainun, iwanan, mishki kenebaunibu anu mapuxun jatu detekin jatiditun pia ichapa bishku bishku akubainaibun uxe ichapa kaya <sup>2</sup> Sedequías xanen ibujaidatun jatu yunukubainaya xaba 9 inun, uxe 4 inun, año 11 kaitian janu Caldea nawa detenamenikabu atimas Jerusalén maewan anu jiki taebidan <sup>3</sup> Jehová kenwanti jiwe dapi janu jikiti kene xui namakis anu Babilonia xanen ibujaidatun jawen xanen ibu bexmasbu dasibi janu manitan xanen ibui

tsauxun jatu yunukin taewabaini jati inibukiaki, jatun xanen ibu tibidan, Nergal-sarézer inun, Samgar-nebó inun, Sarsequim xanen ibujaidabe tsaumis inun, xanen ibu yununika betsa Nergal-sarézer betsan.

<sup>4</sup>Ja Caldea nawabu jaskai jiki taeai bu uintan Sedequías inun jawen detenamenikabu dasibi paxai meshu medan kene dabe namakis beputi xui betsa beputiya bepentan xanen ibun bai anu janu jua pepa jawendua banamisbu baiwen Caldea nawabu jatu june dunkebaini Jene Jordán napanpakidi bai kanwen kushibaini paxaibun <sup>5-6</sup>jakia Sedequías june kainai Caldea nawabun bechitan chibain kushidiabaini Jericó napanpa anu jaki nukutan Sedequías achitan mai pakea Hamat anu mae betsa Riblá anu Babilonia xanen ibujaida anu iyubu januxun jawen kupiti Nabucodonosorin Sedequías yuitan jabianuxundi Sedequíasin bedubi jawen juni bakebu inun Judán enabu xanen ibubun enabu dasibi jau tesen keyununbun Nabucodonosorin jatu yunua jatu tesen keyutan <sup>7</sup>Sedequíasdi jawen bedu tsekaxun mane dispi chiwetameyawen menextan Babilonia anu jau iyununbun jatu yunua jawen bedu tsekaxun mane dispi chiwetameyawen menex dabetan Babilonia anu Sedequías iyuaibun

<sup>8</sup>Januxun Caldea nawabun Sedequías xanen ibujaidatun jiwe jawendua inun jatun jiwe dasibi Caldea nawabun chiwen kuakin keyutan, Jerusalén mishki kenebaunibu bedan keyui dayajaidakubainkin atimas bedankin keyuabun <sup>9</sup>Januxun Babilonia xanen ibujaida mekenikabu yununika jawen kena Nebuzaradánen jawen detenamenikabu yunua ma ichapa jatu iyubaiabun jatidi jatu texewabainimabu jawen jenekin jatundi jatu iyukin jabun Jerusalén anuxun Caldea nawabu jatun yuda jatu inainmabudi Jerusalén anu jiweabudi jidabi Babilonia anu jau jatu iyununbun jatu yunua jawen detenamenikabun jatu iyuaibun <sup>10</sup>Judán enabun mai pakea anu jatidi jawa jayamajaida nuitapaibu bashitan uva nishi bai inun yunu bai jau dayakin mekekubainxanunbun ibuwamakin Nebuzaradánen jatu yunubainikiaki.

#### **Nabucodonosorin Jeremías pe duawanikiaki, na janchadan**

<sup>11</sup>Jawen mae anu kai chintundiama Jeremías kidi pe shinankin Babilonia xanen ibujaida Nabucodonosorin jawen mekenikabu yununika Nebuzaradán yunukin yuikin:

<sup>12</sup>“Ja Jeremíasdan, jawa ichakawama mekekin duawakin jaskada ikatsis ikin mia yukai keska axunxanwen”, abaini kaya <sup>13</sup>Januxun Nebuzaradán inun, Babilonia xanen ibujaidabe tsauxun yununika dabe Nebusazbán inun Nergal-sarézer inun, betsa xanen ibu bexmas betsa betsapabun <sup>14</sup>xanen ibun jiwe mekenikabun jemaintin kenebaunibu anua Jeremías jau taxnimanunbun jatu yunuabu buxun Jeremías kainmatan iweabu jawen jiwe anu iyuxun jau mekekubainxanun Safánen baba

Ahicamnen juni bake Guedalías yunuabu jawen jiwe anu Guedalíasin Jeremías iyuimaxun mekekubainaya yudan kaian jawauma nuitapaibube Jeremías jiweyunikaki.

\*\*\*\*\*

**Jehová kenwanti jiwe anua jawen mabu bitan jiwe  
kuanibukiaki, na janchadan**

*(2 R 25.8-21; 2 Cr 36.17-21; Jer 39.8-10)*

**52** <sup>12</sup>Nabucodonosor Babilonia xanen ibujaidakunkaini ja xaba 10 inun, uxe 5 inun, año 19 kaitian Babilonia xanen ibu bexmas jatun xanen ibujaida mekenikabu yununika Nebuzaradán jawen detenamenikabu ichapabube Jerusalén anu ana bei jikitushitan <sup>13</sup>Jehová kenwanti jiwe inun, xanen ibujaidatun jiwe jawendua inun, dasibi yununikabun jiwe ewapa jawendua tibi inun, dasibi mae anu jawen jiwemisbu tibi chiwen kuakin keyukin <sup>14</sup>januxun jabiabundi Jerusalén mishki kenebaunibu bedankin di aki dayajaidakunkainkin atimas di akin keyuaibun <sup>15</sup>Jerusalén anu jabu nuitapaibu bashikuimabu inun, jabun Babilonia xanen ibujaidatun yunua chibainmabu inun, mabu wanikabu texeimabu Nebuzaradánen jatu ichawaxun Babilonia anu jau jatu ana iyununbun jawen detenamenikabu ichapabu yunua Babilonia anu main jatu iyuaibun <sup>16</sup>januxun jau jabun uva bai inun yunu bai dayakin jau mekekubainxanunbun nuitapajaidaibu besti jatun mae anu Nebuzaradánen jatu ana bashinikiaki.

<sup>17</sup>Jatu jaska wadiamadan, Caldea nawabu detenamenikabun Jehová kenwanti Templo anua jawen mabu Babilonia anu bukatsi ichawaxun jawen bronce mane chibu keyatapa dabe inun, jaki chibu tsaundabenibu inun, jawen bronce mane unpax aduti ewapajaida teke teke atan <sup>18</sup>januxun jabu bukatsi jaki chi mapu beamisbu inun, jatun pala inun, jatun bin paji mexteti tsisuda inun, kencha ewapa inun, beati ewapa, dasibi bronce mane mabu betsa betsapa jawen Dios kenwanti jiwe Templo anua jaya ichawakin keyuabun <sup>19</sup>januxun jatu yunubiakin jawen xanen ibujaida mekenikabu yununika Nebuzaradánen jatubetan oro mane mabu inun, plata mane mabu dasibi, jaki mepanuti inun, kenti inun, kencha ewapa inun, jaki chi mapu beati inun, bin jaki tsaunti inun, beati betsa inun, kencha pishta jawen Dios kenwankin vino jaki juxketan amisbu ichawaxun bunikiaki.

<sup>20</sup>Ja Jehová kenwanti jiwe anu jawen bronce mane chibu dabe inun, ja bronce chibu jaki mistuti dabe watan jaki tsaunibu inun, jaki unpax manekin mata wati bronce tuduakea ewapajaida inun 12 ina awa bene bronce dami kekunbaunibuki unpax matawati jau anunbun xanen ibujaida Salomónen jatu yunua anibu jawen xankama jaska waxun tsuan tanatiduma <sup>21</sup>ja bronce mane chibu tibi jawen keyatapa 8 metro binua inun, jawen ewapa iakea 5 metro ana namakis inun, uke medan jawen naxui inun jawen kextu 7 centímetro jaska

jatu amani chakabuwanibukiaki. <sup>22-23</sup>Ja chibu masua tibiki mane bronze maiti jawendua jawen keyatapa 2 metro binua machudamea jawen kesukauna anu 100 mane bronze ji bimi dami wakín jawendua waxun keduntanbaunibu jakia 96 ji bimi dami xabakabi uintidubu wanibukiaki, ja dabe jaska dabes wakínan.

**Babilonia anu Judán enabu ana jatu iyukin keyunibukiaki, na janchadan**

<sup>24</sup>Xanen ibujaida mekenikabu jatun yunúnika Nebuzaradánen jatundi jawen detenamenikabu yunúkin Jerusalén anu yudabu bashikunibu jatu iyukatsi jatu ichawamakin jawenabu Diosbe janchaxúnika xanen ibu Seraías inun, betsa jawenabu Diosbe janchaxúnika xanen ibu ja kachu Sofonías inun, Jehová kenwanti jiwe jikiti xui beputi mekenikabu dabe inun besti inun, <sup>25</sup>detenamenikabu yunúnika xanen ibu bexmas inun, Judán enabu xanen ibujaida dayaxunmisbu 7bu bashikunibu inun, ja junin detenamenikabu wakín jatu katumis xanen ibu bexmas inun, 70 junibu medabenanmisbu dasibibun ja mae anuxun unainbu Jerusalén anu jabu bashikuni jiweabu bechitan <sup>26-27</sup>achikin jatu ichawaxun mai pakea Hamat anu mae betsa Riblá anuxun Babilonia xanen ibujaidatun jatu manai anu janu Nebuzaradánen jatu iyuxun jawen xanen ibujaida bebun jatu nichintushia mapuabu jau jatu detekin tenanunbun Babilonia xanen ibujaidatun jatu yunua jawen detenamenikabun ja junibu dasibi tenan keyunibukiaki.

Jaska wakín Judán enabu achixun jatun mai pakea anua chajaida jatu iyunibukiaki. <sup>28</sup>Babilonia anu Nabucodonosor xanen ibujaidakunkaini ma 7 año kainkin ja yudabu Judán enabu jatun mai pakea anua jatu iyukin tananibudan, 3,023 yudabu inibukiaki. <sup>29</sup>Janua jawen xanen ibu ana ewakaini Nabucodonosor 18 año kaitian Jerusalén anua ana jatu iyukin 832 yudabu jatu iyumadianikiaki. <sup>30</sup>Janua Nabucodonosor xanen ibujaidakunkaini ma 23 año kainkin jatu yunua Judán enabun mai pakea anua ana jatu achitankin 745 yudabu Babilonia anu Nebuzaradánen jatu iyunikiaki. Jati jaki dasi wakín jatu tananibudan, dasibidan, 4,600 yudabu jatu iyunibukiaki.

**Bichiti jiwe Babilonia anua Joaquín taxnimatan  
duawanikiaki, na janchadan  
(2 R 25.27-30)**

<sup>31</sup>Judán enabun mai pakea anua xanen ibu Joaquín iyunibu ma xaba 25 inun, uxe 12 inun, año 37 kainaitian Babilonia anua xanen ibujaida bena jawen kena Evil-merodacin jatu yunúkin taewai Joaquínwen nuikin duawakin bichiti jiwe anua taxnimaxun <sup>32</sup>bechipaiái uinmakin Babilonia anu xanen ibubu Nabucodonosorin jatu iwemabidanbidankin jatu ichawani Evil-merodacbe ja dapi tsaubiabaunabun janu xanen ibun tsauti dapi jabe ketaxamekatsi betsa xekatan jatu binumakin ja dapijaida Joaquín tsauntan <sup>33</sup>bichiti jiwe anuxun tadi sawemis pekamatan jawen xanen ibun tadi Joaquín ana sawemakin duawakin jatixun jiweaitian

jiwemaxun xaba tibi xanen ibujaida Evil-merodacbetan pikubainikiaki.  
<sup>34</sup>Ja dikabi jatixun mawadiama jiweaitian pe jiwemakin xaba tibi  
Babilonia xanen ibujaidatun duawai jawen jamapai tibi Joaquínen  
bikubainikiaki.